

圓夢與兒時偶像合唱 遭鄧麗欣「調情」 MC一秒耳紅

鄧麗欣(Stephy)一連三場紅館演唱會前晚舉行第二場，邀得曾合作電影《我談的那場戀愛》的張天賦(MC)擔任表演嘉賓，二人合唱《好心好報》，完美還原電影中Stephy為MC打領呔的調情戲，MC害羞得一秒耳紅，非常搞笑。

鄧麗欣前晚舉行紅館演唱會第二場，Cookies 五名隊友吳雨霏(Kary)、楊愛謹(Miki)、區文詩(Angela)、何綺玲(Elaine)與陳素瑩(Gloria)結伴捧場。擔任嘉賓的MC以白馬王子Look出場，與穿白色連身長裙的Stephy非常合襯，MC說：「其實我好緊張，因為好少同你咁近距離。上次係拍戲打吹嗰陣，依家都有啲餘韻，好緊張！」Stephy說：「其實拍戲先至真正認識你，之前只係聽過你啲歌，知你唱歌好好聽。」MC則說：「我好早認識你！」Stephy無奈一笑，MC續說：「我每次演出最緊張係記歌詞，有時要靠提詞機，但今次合唱呢首歌我唔擔心，因為歌詞我好熟，我好自信可以望住你唱。」Stephy說：「唉！你講啦，細細個去唱K成日唱咩嘛，我畀你講，冇所謂！」MC不客氣表示能與Stephy合唱是成就解鎖，完成兒時夢想，全場大笑。

Stephy禮尚往來，送上領呔答謝MC做嘉賓，更二話不說即場為他戴上，兩人幾乎面貼面，正當Stephy讚他沒有面紅時，但MC卻耳紅，全場爆笑！Stephy退場後，MC不停用手撥風為耳朵降溫，他尷尬說：「真係唔啱人，我一尷尬就耳仔紅。」然後演唱新歌《說謊者》。

畫作融入演唱會

演唱會尾聲，Stephy唱《Fantasy Tale》，觀眾都站起來跳舞，氣氛熱鬧。她透露演唱會期間，大銀幕展示的畫是她特別為今次演唱會而畫：「雖然準備演唱會好忙，但我堅持畫畫，因為除咗唱歌跳舞表演之外，亦希望視覺上都加入自己嘅心思。可能只有我自己明白，例如創作期間嘅思考，都可以注入一啲神秘嘅力量，融入演唱會。」完場後歌迷不肯離開，Stephy再出場唱《最後一塊》後，與樂手一齊跟觀眾謝幕。

■左起：Gloria、Elaine、Miki、Kary與Angela結伴睇騷。



■鄧麗欣與舞蹈員大跳辣身舞。



■獲鄧麗欣打領呔的MC一臉尷尬。



楊丞琳 5月香港開騷

不滿廣東話退步

楊丞琳將於5月4日舉行《「LIKE A STAR」世界巡迴演唱會》香港站，昨日在九龍塘舉行記者會。她在記者會上堅持盡量講廣東話，她說：「香港嘅朋友真係好耐冇見，我好掛住你哋！尋晚做表演，好興奮同緊張，好耐冇嚟香港同大家見面，好耐冇講廣東話，想盡量講多啲，冇乜機會講，只係同媽媽講，所以想講多啲。」她自覺廣東話退步不少：「我好嬲自己！」主持即教她講「我嬲嬲豬」，楊丞琳聽後反問是否合適：「因為自己都40歲喇！」

楊丞琳自爆很想跟蔡卓妍(阿Sa)見面，「舊年私事嚟香港一日，佢啲活動前同我見面一小時飲下午茶，佢係我好珍貴嘅朋友，好希望邀請睇住我長大嘅朋友一齊嚟睇騷。」她更以「老Best」形容現場歌迷：「我真係好愛你哋！」



■楊丞琳保養得宜，依然是「可愛教主」。

莊子璇父親 積極面對治療

張振朗、劉穎璇、郭柏妍與莊子璇等前晚錄影節目《大師兄玩轉Easter感謝祭》，提到莊子璇爸爸早前做通波仔手術時一度心臟停頓，要入ICU搶救，她透露爸爸已出院：「佢嘅情況好咗好多，依家有話唔肯食藥，同埋冇出現幻覺。(有冇追究醫院?)我哋好感激醫院盡力搶救，至於係咪醫療事故我就唔清楚。」她續指父親現時行動有點困難，但堅持走路及積極面對治療，暫時搬到跟嫻嫻一齊居住，她每日放工都會探望爸爸。



■莊子璇透露父親已出院。

蕭正楠爆翠如不捨孕肚

蕭正楠老婆黃翠如腹大便便，快將生B。昨日蕭正楠在社交平台上載老婆的孕照，並爆對方很捨不得孕肚：「蕭太太最近每天都說，很不捨小肚子。看見她隨時隨地瘋狂吃東西，說是為了填飽小肚子，又看見她不停拿着手機拍攝愛動的肚皮，和每天晚上自言自語，猜她是想教導出乖巧的小肚子。希望小肚子，這段時光有快樂地過日子！」見蕭正楠用手指篤老婆的孕肚，翠如則笑到見牙唔見眼，好友陳敏之與湯洛雯等都留言讚他們很恩愛，期待小寶寶盡快來臨。



■蕭正楠輕篤翠如肚皮，恩愛爆燈。